

Director di MFA Paradera, Kenneth Croes:

“Habitantenan ta pura pa e edificio aki keda cla”

E director di Facilidat Multifuncional (MFA) na Paradera, Kenneth Croes mes a ripara e entusiasmo cu ta biba entre e habitantenan di e distrito aki pa cu yegada di e un edificio nobo cu lo brinda hopi servicio. Croes tabata un di esnan cu a duna presentacion diaranson anochi durante e Anochi di Informacion riba MFA teni na Club Caiquetio. “Mi ta contento di wak e hendenan entusiasma cu e proyecto,” asina e funcionario publico a bisa.

Kenneth Croes ta forma parti hunto cu asistencia di Sr. Mario Kelly, di e team di maneho di e Facilidat Multi-Funcional na Paradera. E centro ta bira sede di Hulpbestuurskantoor, ademas di varios otro servicio cu e fin di trece atencion na cliente mas cerca di cas. Tambe ta conta cu varios espacio destina pa estudio, reunion, encuentro social y actividadnan cultural.

“Mi ta sumamente contento di wak e atencion di e habitantenan di Paradera y bisindario cu un entusiasmo asina positivo, atencion y preguntanan; tambe sugerencianan pa cu e proyecto aki,” asina Croes a comenta na final di e Anochi di Informacion. Esnan presente na e sesion publico a haya presentacion tambe di Director General di MFA Anky Vrolijk y di arkitecto di e edificio, ir Jouel Croes. E ultimo aki a splica con e diseño ta conta cu elementonan cu ta simbolisa e importancia grandi cu e habitantenan ta duna na e aspecto religioso. Tambe tabatin oportunidad pa bisiñanan por a trece dilanti nan sugerencia y comentario. Esakinan ta sumamente valioso pa e organisacion.

Habitantenan ta pura pa e edificio keda cla pa asina nan por cuminsa disfruta di e servicionan cu lo wordo duna. “Y no esey so, pero ta wak cu esey lo trece

e bario hunto manera antes,” Kenneth Croes a bisa. Parti di nan tarea ta pa for di awo cera contacto cu e diferente organisacion, grupo y habitantenan den e distrito pa asina hunto traha riba proyecto, programa y actividadnan. Ta bay pone atencion na e aspecto cultural y social.

E edificio di MFA di Paradera ta bay ta ubica riba caminda grandi, otro banda di caminda di unda Hulpbestuurskantoor di Paradera ta situa na e momentonan aki. Proceso di Destaho Publico a finalisa caminda actualmente e compania encargada cu construccion ta papiando cu arkitecto Croes. Di e forma ey ta cuminsa haci e preparacion pa inicio di construccion cu ta cuminsa e aña aki mes.

MFA of Facilidatnan Multi-Funcional ta un iniciativa di Prome Minister Mike Eman. Ta un elemento mas den e vision di Gobierno di Aruba pa desaroya un

comunidad mas uni y prospero. Districtonan di Noord, Paradera, Santa Cruz, Savaneta y San Nicolas, cada un lo haya nan propio MFA.

